



## INTRODUCZIUN

DA MARCEL KÖHLE

*La situaziun ella cuminonza dad Efesus era spanegiada sco la lecziun da questa dumengia tradescha. Sco ei para, ha ei dau grondas carplinas pertuccont la damonda tgi che seigi pli damaneivel a Cristus. – Certins dalla cuminonza eran dil meini ch'ils Gadius seigien pli damaneivels a Cristus ch'ils pagauns, perquei ch'els cartevan gia avon e vevan aschia in ligiom cun Diu.*

*Mo igl autur dalla brev insista fermamein ch'ei detti en Cristus negina differenza pli denter Gadius e pagauns. Jesus seigi vegnius per omisdus ed hagi purtau pasch a tuts, tuttina sch'els eran avon cartents ni buca.*

*E quella perschuasiun astga era ozildi esser confiart: En Cristus vegn schenghegiu pasch a nus e nus tuts essan tuttina damaneivel ad el, tuttina tgei provegnientscha che nus vein!*

## 1. LECZIUN

*Ef 2,13–18*

Vus che fuvas inaga dalunsch essas ussa vegni damaneivel enten Cristus Jesus, numnadamein tras siu saung. Pertgei el ei nosa pasch. El ha reuniu Gadius e pagauns ad in pievel ed ha disfatg en sia carn la seiv che sparta els, l'inimicezia.

El ha annullau la lescha cun ses camonds e sias prescripziuns, per crear tras sesez ord quels dus in sulet carstgaun niev, per far aschia pasch e reconciliar domisdus tras la crusch cun Diu en in sulet tgierp. En sia persuna ha el mazzau l'inimicezia.

El ei vegnius ad annunziar: Pasch a vus, ils dalunsch, e pasch a quels ch'eiin damaneivel. Tras el vein nus domisdus el medem Spert liber access tier il Bab.